

Ils custs per la sanadad en il focus

Rapport dal survegliader dals pretschs

DA LUCAS DEPLAZES / ANR

■ Las sfidas da la digitalisaziun e l'augment constant dals custs per la sanadad publica stattan en il center da la lavur dal survegliader dals pretschs.

Passa 1500 reclamaziuns dals consuments ha tractà l'onn passà il survegliader dals pretschs. Las pli bleras reclamaziuns ha el reschet dals secturs sanadad, tariffas dals servetschs publics ed or da la bransch da finanzas. Sco quai che ha accentuà *Stefan Meierhans*, il survegliader dals pretschs, èn s'augmentads ils custs per la sanadad dapi l'introducziun da la nova lescha l'onn 1996 per il dubel dal svilup economic u tschintg giadas dapli che las pajas. Il svilup dals custs per la sanadad vegnan er a restar en il focus l'onn 2017, ha confermà Meierhans a chaschun da l'orientaziun da las medias a Berna. El vesa ina pussaivladad da franar ils custs cun dismetter stimul s'abigliads per tractaments. Ina gronda sfida muntia natiralmain er il svilup sin il sector da la digitalisaziun. La digitalisaziun è ina realitad e vegn ad avair consequenzas sin ils pli divers secturs, er tals da la sanadad publica, sco per exempel dossiers persunals per pazients. La digitalisaziun porschia dentant er novas schanzas.

Noss ospitals han anc potenzial

L'onn 2016 ha cumpareglià il survegliader dals pretschs la qualitat dal tractament ed ils custs en ils ospitals svizzers cun quels da l'exteriur. Tenor Meierhans ha demussà l'examinaziun che las relaziuns tranter pretschs/custs e las prestaziuns da noss ospitals ston vegnir megliaradas en ils proxims onns. Noss ospitals hajan anc in considerabel potenzial da curreger. Il survegliader dals pretschs ha perquai transmess als chantuns diversas recumandaziuns per fixar las pauschalas



Il survegliader da pretschs Stefan Meierhans a l'ocasiun da l'orientaziun da pressa a Berna.

KEystone

per cas (Basrate) en l'avegnir. La recenta cumparegliaziun dals pretschs per medicaments cumprova che uschebain ils pretschs per generica e tals per medicaments che nèn betg pli sutta mess al recept custian en Svizra il dubel. Tenor Meierhans duessan ils pretschs per tut ils preparats vegnir examinads mintg'onn, plinavant recumonda el d'indemnisar mo ils medicaments ils pli favoraivels. Meierhans crititgescha plinavant ch'ins calculeschia anc adina ils pretschs cun in curs da l'euro dad 1.28, cumbain ch'il curs è daditg sut 1.10. Meierhans vul che las cassas da malsaus stoppian er rem-

bursar medicaments retratgs en l'exteriur. Las cassas da malsaus e las organizaziuns dals pazients duain avair il dretg da far recurs.

Servetsch public

Tenor il survegliader dals pretschs eran surdimensionadas las tariffas per il traffic public, planisadas per la midada d'urari 2016/2017. En lungas tractativas cun las interpresas da transport èsi reussì da furmar in pachet da mesiras da var 50 milliuns francs che duai cumpensar in pau l'augment massiv dals abunaments general. Tar La Posta pussibilitescha ina cun-

vegna da realisar var dusesch milliuns francs en favur da la clientella. Tar Post-Finance ha cuntanschi Meierhans ina reducziun da la tariffa da transfer. Quai munta ina reducziun da 3-4 milliuns francs per ils proxims onns. Cun in spiert critic accompogna il survegliader dals pretschs la revisiun da la lescha davart la telecomunicaziun. El pretenda dapli concorrenza sin il sector dal martgà da la comunicaziun mobila e recumonda al cussegl federal da fixar ina limita per tariffas dal provediment da basa. Il proxim temp vegn Meierhans er a sa fatschentar cun il sistem da reservaziun d'hotels.